



Tunngaviusumik Inatsisissaq pillugu Isumalioqatigiisitamut suliakkiissutinut najoqqtassiaq

Inatsisartut aamma Naalakkersuisut aalajangerpaat isumalioqatigiissitaq pilersinnejassasoq Tunngaviusumik Inatsisissamik suliaqartussaq. Tunngaviusumik inatsisissamut siunnersuut Tunngaviusumik Isumalioqatigiisitap suliarissavaa, suliarlu naammassippat saqqummiunnejassalluni.

Isumalioqatigiisitap politikkikkut katitigaanera sapinngisamik partiinik tamani sinniisuuffiunissa kissaataavoq. Tunngaviusumik inatsisissamut siunnersummik suliaqarnermi Nunarput pillugu ilisimasaqartut aamma ilisimasatigut piukkunnaateqartut ilaatinnejassapput.

Tunngaviusumik inatsisissamut missingiussaq Kalaallit Nunaanni tamat oqartussaaqataaneratigut akuerisaassaaq, inatsisinnilu tunngaviussalluni Kalaallit Nunaat naalagaaffinngorpat.

Danmarkimi naalakkersuisut Namminersorlillu Oqartussat isumaqatigiissuteqareerput, Kalaallit Nunaata namminiilivinnissaanik aalajangerneq inuaat kalaallit aalajangererannik tunngaveqassasoq.

Tunngaviusumik Inatsisissaq pillugu Isumalioqatigiisitap suliassaa

Tunngaviusumik Inatsisissaq pillugu Isumalioqatigiisitap Kalaallit Nunaata Tunngaviusumik Inatsisissaanut siunnersuut immikkoortunut marlunnut piffissami marlunni assiginngitsunut tunngaviusussamik siunnersuusiussaaq, tunngaviusumik inatsisissami alloriarfik siulleq namminersornerup nalaani atuutilersinnaalluni aamma Kalaallit Nunaat danskit inatsisiniut tunngaviusunut danskit naalagaaffiata sinaakkusiussaasa iluanni tapiliussaalluni. Nunap aaqqissuussaaneranut aqunneqarneranullu maleruagassanut tunngaviusussanut immikkoortup aappaa Kalaallit Nunaat inatsisiniut tunngaviusunit aamma danskit naalagaaffiannit anippat kalaallillu inuit namminerisaminnik naalagaaffimmik namminiilivissumik pilersitsippata aatsaat atulersinnejassaaq.

Nunap aaqqissuussaaneranut aqunneqarneranullu maleruagassanut tunngaviusussanut missingersuusiami inatsiseqarfiusup assinganut allanik aalajangersakkanik piareersaasoqassanersoq isumalioqatigiisitap nammieq nalilerlugulu aalajangissavaa. Taamaalilluni nunap aaqqissuussaaneranut aqunneqarneranullu maleruagassani tunngaviusuni immikkoortup assingani piffissami danskit naalagaaffianinnerup nalaani atuuttunik aalajangersagaqarluni, aamma aalajangersakkat nutaat aatsaat namminiilivittoqalerpat taarsiuullugit atuutilernissaannut piareersimallutik. Imaluunniit assersuutigalugu nunap aaqqissuussaaneranut aqunneqarneranullu maleruagassani tunngaviusuni immikkoortunut ataasiakkaanut tamanut ataasiinnarmik

aalajangersagaqarluni. Aalajangersakkat ilai piffissami danskit naalagaaffianiinnerup nalaani atuutissapput, aalajangersakkallu sinneri Kalaallit Nunaat namminilivippat atuutilissallutik.

Tunngaviusumik inatsisissamut isumalioqatigiissitap sulinerminit Inatsiseqarnermut ministereqarfik peqataatissavaa, taamaalilluni tunngaviusumik inatsisissami aalajangersakkanut missingiussaq ingerlaavartumik Inatsiseqarnermut ministereqarfip nalilersorneqarsinnaaneri qulakteerneqarlutik. Taamaalilluni tunngaviusumik inatsisissamut missingiutip imaa Naalagaaffiuteqatigiinnerup tunngaviusumik inatsisaata sinaakkusiussaata iluaniissinnaaneri qulakteerneqarluni. Inatsiseqarnermut ministereqarfip peqataatinneera qanoq ittuussanersoq isumalioqatigiissitap aalajangissavaa.

Kalaallit Nunaata namminilivinnera atuutilerpat Kalaallit Nunaata naalagaaffimmik allamik pituttugaanngitsumik- Free association, atassuteqalersinneranik periarfissiisumik tunngaviusumik inatsisissaq pillugu isumalioqatigiissitaq aalajangersakkanut missingersuusiussaaq.

Isumalioqatigiissitap sulinini nammineq aaqqissuutissavaa, tassunga ilanngullugu suleqatigiissitanik pilersitsisoqarsinnaanera. Isumalioqatigiissitaq sulinermini atugassaminik kalaallit nunaanni qitiusumik allaffissuarmiit, kalaallit nunaanni inuaqatigiinnit aamma Kalaallit Nunaata avataanit immikkut ilisimasalinnik paassisutissanillu pissarsiniarsinnaavoq – aalajangersimasunik suleqataagallartussanilluunniit.

Killilersugaanngitsumik oqallifiisinnaasunik apeqquteqarfiusinnaasunillu allanut oqaatigeqqusaanngitsunik ataatsimiinnernik ingerlatsinissamik pissutissaqartumik isumalioqatigiissitaq pisariaqartitsisinnaavoq. Tamanulli ammanissaq Inatsisartullu ilanngunneqarnissaat eqqarsaatigalugit tunngaviusumik inatsisinut missingiummik inaarutaasumik annertunerusumik piginneqataanissaq aamma pingartinneqartariaqarpoq.

Tunngaviusumik inatsisissaq pillugu Isumalioqatigiissitap katitigaanera

Tunngaviusumik inatsisissaq pillugu Isumalioqatigiissitaq arfineq marlunnik ilaasortaqassaaq, Isumalioqatigiissitarlu katiterneqassalluni, partiit tamarmik, Inatsisartunut qinigaasimasut, sinniisutitaqartillugit. Qaqgukkulluunniit Inatsisartunut qinersinerup kingullerpaap kingorna Inatsisartuni partiit angissusaannik sanilliussineq apeqqutaatillugu partiit sinniisutitaqartinnejassapput. Tamanna isumaqarpoq, qinersinerit akornanni Inatsisartut katitigaaneranni allannguutit Tunngaviusumik inatsisissaq pillugu Isumalioqatigiissitap katitigaaneranik allannguinermit kinguneqassanngitsut.

Partiit namminneq Inatsisartuni ilaasortaatassaminnik Tunngaviusumik inatsisissaq pillugu Isumalioqatigiissitamut inassuteqassapput. Naalakkersuisunut ilaasortat Tunngaviusumik inatsisissaq pillugu Isumalioqatigiissitamut inassutigineqarsinnaanngillat. Isumalioqatigiissitami ilaasortat Inatsisartunit ataatsimiitaliap "Tunngaviusumik inatsisissaq pillugu Isumalioqatigiissitaq pillugu Ataatsimiitaliaq" tusarniaaffigereernerata kingorna Naalakkersuisunit akuerineqassapput.

Ilaasortassatut inassutigineqartut akornanni, Inatsisartunut qinersinermi kingullermi partii amerlanerpaanik taaneqartoq, Tunngaviusumik inatsisissaq pillugu Isumalioqatigiissitamut siulittaasumik toqqaassaaq, aammalu Inatsisartuni partiit angineraasa tulliannit isumalioqatigiissitami siulittaasup tullia toqqarneqassaaq.

Inatsisartunut qinersinermi Inatsisartunut qinigaaqqinngikkaanni qinigassanngorteqqinngikkaanniluunniit Tunngaviusumik inatsisissaq pillugu Isumalioqatigiissitami ilaasortaq, Isumalioqatigiisitamiit tunuartariaqarpoq, nutaamillu ilaasortassamik toqqaasoqarluni.

Taamaattoq, pissutsini immikkut ittuni, Isumalioqatigiissitamut Inatsisartuni ilaasortaq qinigaaqqinngitsoq partiip inassutigeqqissinnaavaa. Ilaasortaq Isumalioqatigiissitami ingerlaqqissinnaavoq, tamanna Naalakkersuisunit Isumalioqatigiissitallu siulittaasoqarfianit akuerineqarpat. Isumalioqatigiissitap siulittaasoqarfia Inatsisartunit tunuarpat, Naalakkersuisut kisimiillutik, akuerinnissinnaatitaapput, taakkua (Isumalioqatigiissitamut siulittaasoq siulittaasullu tullia) ingerlaqqissinnaanerannik.

Inatsisartutut akissarsiami saniatigut, Isumalioqatigiissitap ilaasortai akissarsiaqanngillat. Isumalioqatigiissitami ilaasortat, Inatsisartutut akissarsiaqanngitsut (imaluunniit suliunnaarnersiillit) Isumalioqatigiissitami sulinerminnuttaaq akissarsiaqassanngillat.

Isumalioqatigiissitami ilaasortat avataani soqtigisat apeqqutaatinnagit sulissapput.

Tunngaviusumik inatsisissaq pillugu Isumalioqatigiissitamut aalajangeeqataasinnaanatik peqataasartussat

Tunngaviusumik inatsisissaq pillugu Isumalioqatigiissitamut aalajangeeqataasinnaanatik aalajangersimasumik peqataasartussanik marlunniit sisamanut toqqaasinnaapput.

Tunngaviusumik inatsisissaq pillugu Isumalioqatigiissitaq marlunniit sisamanut aalajangersimasunik Tunngaviusumik inatsisissaq pillugu Isumalioqatigiissitamut aalajangeeqataasinnaanatik peqataasartussanik toqqaasinnaavoq, tamatumalu kingorna Isumalioqatigiissitap Siulittaasoqarfia Naalakkersuisut ilisimatissallugu. Aalajangeeqataasinnaanani peqataasartussamik ataatsimik illuatungiliuttut toqqaanissamut periarfissinneqarput.

Anguniagaavoq, aalajangeeqataasinnaanatik peqataasartussat peqatigiillutik annertuunik pineqartumut tunngassutilinnut piginnaasaqarnissaat, inatsisilerinermut ilisimasaqassuseq (taannaannaanngitsorli) ilaatiillugu.

Allat suliamut paasisimasallit, tassaasinnaasut pisortani oqartussaqarfinit sinniisut/immikkut ilisimasallit, soqutigisaqaqatigiiffiit, sumiiffimmi qinikkat imaluunniit inuit ilisimasatigut piginnaasallit, siulittaasoqarfipuq qaaqqusineratigut Isumalioqatigiissitaq pillugu ataatsimiitaliaq tunuliaqutaralugu Isumalioqatigiissitami sulinermi peqataasinnaapput.

Isumalioqatigiissitami suliamut ilisimasaminnik misilitakkaminnillu aalajangeeqataasinnaanatik peqataasartussat tapersiuteqassapput, taamaattorli Isumalioqatigiissitamut allaqqitassiap imarisaa pillugu inaarutaasumi aalajangiinermi peqataasinnaanatik.

Inatsisartunut qinersinerup kingorna aallaavittut aalajangeeqataasinnaanatik peqataasartussat taarserneqartassanngillat.

Innuttaasunik akuutitsineq

Tunngaviusumik inatsisissaq pillugu Isumalioqatigiissitap sulinermini nunatsinni tikitassat tamaasa najuunnikkut qarasaasiatigullu angusassavai. Isumalioqatigiissitap innuttaasut naapinnissaat isumagissavaa, eqqarsaataagallartunik saqqummiivigisarlugit aammalu pisunut najoqqtassianullu tunngasunut naleqartitallu pillugit takorluukkanut Isumalioqatigiissitap suliaanut qisuarialit pissarsiariissallugit.

Ilisimasanik isumassarsiassanillu katersiniarluni, aammali naalagaafimmi eqqartussisarnermut tunngasut attuumassutilit tunngaviusut oqaloqatigiissutiginiarlugit, najoqqtassiat naleqartitallu aammalu annertunerusumik tamakkununnga tunngasut eqqarsaatersuutit inuiqatigiinnut saqqummiunnissaannut peqataaniarluni Isumalioqatigiissitap aalajangiussinnaavaa ataatsimeersuaartitsinermik aaqqissuussiniarluni.

Kalaallit Nunaanni innuttaasut tamarmik inatsisinut tunngaviusussanut isumalioqatigiissitamut siunnersuutinik saqqummiussinissamut pisinnaatitaaffeqarput. Isumalioqatigiissitami ilaasortat, siulittaasoqarfik aggersitallu aalajangersinnaapput siunnersuut taamatut ittoq isumalioqatigiissitami qaquinneqassasoq, siunnersuut isumalioqatigiissitami suliareqqinnejarnissaanut tulluarpat.

Isumalioqatigiissitaq nittartakkamik pilersitsissaq, innuttaasut siunnersuutit nassiuissaat tassani tamanit atuarneqarsinnaassapput.

Tunngaviusumik inatsisissaq pillugu Isumalioqatigiissitap allattoqarfia

Isumalioqatigiissitap sulinerani isumalioqatigiissitamik kiffartuussinissamut tulluartumik annertussusilimmik allattoqarfimmik isumalioqatigiissitap nammineq pilersissavaa allaffeqarfimmullu pisortassamik atorfinitssissalluni Naalakkersuisunut tusarniaanerup kingorna.

Tunngaviusumik inatsisissaq pillugu Isumalioqatigiissitap suleriaasissami ilusilersornissaa nammineq aalajangissavaa aammalu allaffeqarfissami sumiinnissaa aaliangissallugu.

Piffissamut killissaliussat

Anguniagaavoq, isumalioqatigiissitap pilersinnejnarneraniit ukiut pingasut qaangiutsinnagit sulineq naammassissoq, aamma Kalaallit Nunaata aaqqissuussaaneranut aqunneqarneranullu maleruagassanut tunngaviusunut missingersummik imaqartoq isumaliutissiissutini naammassippagu saqqummiunneqassaaq. Pisariaqassappat isumalioqatigiissitap sulinermini piffissamik sivitsortinnissaanut periarfissaqarpoq, sivitsuineq Naalakkersuisunit akuerineqassaaq.

Aningaasalersuineq

Tunngaviusumik inatsisissaq pillugu Isumalioqatigiissitaq, isumalioqatigiissitamut allattoqarfik ilanngullugu, aningaasanut inatsimmi nammineq konto pingarneq (konto pingarneq 73.03.01) aqqutigalugu aningaasalersorneqassaaq. Isumalioqatigiissitap allattoqarfiata pilersinnejnarera, aamma Isumalioqatigiissitap sulinerata aningaasalersorneqarnera, allattoqarfimmik aningasalersuineq angalanerillu ilanngullugit sinaakkutip tamatuma iluani akilerneqassapput.